

Fundacion 18 di Maart y famia a ricibí busto di Shon A Eman



ORANJESTAD - Ayera atardi a yega for di Hulanda e busto di Shon A Eman hunto cu Sra. Heleen Levano, kende ta e artesano cu a traha e busto.

Na Aeropuerto tabata presente miembran di e directiva di Fundacion 18 di Maart, Capeis Lacel,

Mary Wever, Dominico Guzman Croes, Albertico Arends, Chinto Erasmus y tambe Sra. Viuda Blanche Eman y jiunan y nietonan y mas famia.

P'e famia e yegada tabata algo bastante emocional ya cu esaki no solamente ta un bunita reconocimiento pa esposo y tata, pero tambe e pensamentonan ta bai bek di biaha riba e dia

duro riba 13 Juli 1967 cu Shon A a fayecé inesperadamente lagando 8 jiu atras.

Tambe e famia di Shon A a expresá hopi palabra di gradicimento na e fundacion y Sra. Levano pa su tremendo empeño. Sra. Levano kende a yega di traha busto di Reina Beatrix a expresá cu p'e tabata un honor di por a traha e busto di e estadista Arubano aki.

Pa a haci esaki el a repasá hopi potret y lesa mas hopi posibel riba e bida di Shon A. A base di esaki su obhetivo tabata pa reflehá e persona di Shon A manera e tabata: un persona determiná cu hopi cariño den su curazón.

Sra. Mary Wever a splica cu Fundacion 18 di Maart a asercá

famia Eman cu e idea di duna Shon A un reconocimiento den e tempo despues cu na e 25 aniversario di su fayecimento un documentario a worde presentá cu a lanta hopi memoria y sentimentonan atrobe. Sra Wever a splica cu e famia no a deseá un statua, pasobra Shon A tabata un persona hopi humilde cu no tabata pensa riba reconocimiento of gratitud.

Aruba tabata su bida y dedicando na esaki tabata p'e un mision natural.

Esaki alabes tabata yena su bida, yudando su país y su pueblo tabata duné e satisfaccion di bida. Pesey e famia a preferá algo mas modesto, manera un busto y

tambe kier a mira un reconocimiento p'e pueblo cu a bringa schouder cu schouder cu Shon A.

Asina e idea di nombrenan di e peticion di 1948 a nace. E reconocimiento aki, p'e Arubianonan cu a para firme p'e anhelo Arubano, e famia a pensa cu Shon A lo a apreciá mas cu tur cos.

Asina hamas historia lo lubida esnan cu desde un

principio a sali nan vanguardia di e status autonómo pa Aruba den Reino.

Esaki Shon A cu a marcha den e accion pa colectá e sostén masal aki y despues hibanan Hulanda lo a deseá.

Di parti di Fundacion 18 di Maart Sra. Wever a gradicé Sra. Levano y tambe tur esnan cu ta cooperando pa a haci e monumento aki bira un realidad. □

